


**TEZAUUR LITURGIC**  
**27 NOIEMBRIE**

**SLUJBA**  
**SF. CUVIOS**  
**ANDREI**  
**OGORODNIKOV**  
**DE LA SIMBIR**



**MOSCOVA, 2000**



# Служба Святому блаженному Андрею, симбирскому Христа ради юродивому

## ВЕЛИЦЕЙ ВЕЧЕРНЕ

### Стихиры на Господи возвах, глас 2

От млада, блаженне, суетная и тщетная мира презрел еси, и Христу прилепився, подвигом юродства и совершенным самоотвержением. Тому угодил еси, непрестанные молитвы принося Господеви и о всем мире моляся, Андрее преблаженне, и ныне молися Господеви спастися душам нашим.

Отряс еси суету и вся тщетные мирския волнения и ко стопам Спасителя мира притекл еси: иго Христово на рамена своя возложив, подвигом юродства тому следовал еси: и ныне молися Господеви спастися душам нашим.

Избран Божественным промыслом быв, блаженне, чистотою души своея Христу послужив, предстоя днесь престолу Божия славы, созерцая свет неизреченный и радость несказанную. Темже вопием ти: отче Андрее, молися Господеви спастися душам нашим.

Чудное и светоносное днесь торжество, память дивного и блаженнаго Андрея совершающе, к Нему же возопиим: о смиреннейший угодниче Христов, предстателю града и страны нашей, молися Господеви спастися душам нашим.

**И ныне: глас тойже.**

Кто тебе не ублажит, Пресвятая Дево...

### **НА ЛИТИИ СТИХИРЫ, глас 5.**

Умом просветленным Пресвятей Троице предстояще, блаженне Андрее, и Тояже славою осеняемый, вся ны просвети, и за чтущих верных людей множество, к мощам честным твоим приходящим, Христа Жизнодавца умоли: спастися душам нашим.

Путем юродства Христа ради шествовал еси, блаженне Андрее, делом твоим явил еси, како в широту райскую добре ходящии во Христе вводими бывают. Темже путем, блаженне, приведи ко Христу и вся верные.

Радуются вси людие вернии, и земля симбирская ликует, празднующе память блаженнаго Андрея: его бо житием дивным украсися чудно Церковь Симбирская, юже Господь таковым крином украси. Того молитвами подаждь, Господи, милость Твою ко

спасению душ наших.

Радуйся, благословенная Владычице, Бога плотию неизреченно рождшая, за нас на кресте смерть приявшаго. Того моли, Всеблаженная, да Твоими молитвами спасет души наша.

### НА СТИХОВНЕ СТИХИРЫ, глас 4

Дал еси дивное утверждение граду Симбирску, Господи, чуднаго смиренника блаженнаго Андрея, неистошимое сокровище преизобильное самоотвержением многим, крепка поборника на гордыню и в бедах заступника: его же молитвами спаси град сей и страну нашу, Иисусе милосерде, и Спас душ наших.

**Стих: Дивен Бог во святых Своих, Бог Израилев.**

Дал еси украшение, Господи, граду Симбирску, честныя мощи блаженнаго Андрея, содейственника бывающа чудесем многим, град от запаления огненнаго избавляюща и молящася Тебе, Иисусу милосердному и Спасителю душ наших.

**Стих: Святым, иже суть на земли Его, удиви Господь вся хотения Своя в них.**

Дал еси новое знамение верующим в Тя, Господи, истиннаго Твоего угодника: вернии бо приемлют утешение скорбным сердцам,

притекающе к нему. Темже убо и мы, днесь сошедшися, память блаженнаго Андрея празднующе, верно Ти, Господи, вопием: того молитвами спаси нас, Иисусе милосерде, и Спас душ наших.

Что тя наречем, блаженне Андрее: земнаго ангела и небеснаго человека, яко в мире сущая ни во что вменил еси; учителя смирения, яко вся в житии терпел еси радостно; пророка и провидца: будущая бо провидел еси яко настоящая, и в тайне содеянное безтрепетно обличал еси. И ныне молися Христу Богу, умирити мир и утвердити Церковь святую.

Храм и Дверь еси, Палато и Престол Царев, Дево всечестная, ею же Избавитель наш, Христос Господь, во тли спящим явился. Солнце сый правды, просветити хотя вся яже созда по образу рукою Своею. Темже, Всепетая, матернее дерзновение к Нему стяжавшая, непрестанно молися спасти души наша.

## **НА УТРЕНИ**

**На Бог Господь тропарь, глас 4**

Небесный наш заступниче,  
За нас пред Богом молитвенниче,

Града Симбирска утешение и похвало,  
В скорбех и бедах скорый помощниче.  
Ныне, блаженне Андрее, к тебе вопием,  
На раку честных мощей твоих взирающе  
И совершенное принося восхваление:  
Простирая нам руку помощи твоея  
Настави нас на путь покаяния.

### ПО ПЕРВОМ СТИХОСЛОВИИ СЕДАЛЕН.

Новаго угодника и дивнаго блаженнаго Андрея  
вернии почтим, светло празднующе всечестную  
память его : той бо молитвами своими к Богу  
предстательствует за ны, научая нас пети  
Христу: прославляяй святых Твоих, Господи,  
слава Тебе.

Множицею избавися род человеческий от зол и  
бед, молящийся пред Твоими, о Богомати,  
святыми иконами. Приими, Владычице, вся  
моления верных о избавлении града сего и  
страны нашей от лютых бед несогласия  
предстательством Твоим.

### ПО ВТОРОМ СТИХОСЛОВИИ СЕДАЛЕН.

Суетную прелесть мира отверг еси, истинному  
Свету и заповедем евангельским последовал еси,  
блаженне Андрее, и юродством Христа ради Ему  
искренне послужил еси. Сего ради зовем ти:

радуйся, блаженне отче Андрее.

Мати Божия, Ты еси свет омраченных, просвети нас потемненных грехами, и простри нам немощным руку помощи Твоя, всем призывающим Тя.

**окимен, глас 7:** Честна пред Господем смерть преподобных Его.

**Стих:** Что воздам Господеви о всех, яже воздаде ми?

**Евангелие:** Матфея, зач. 43 или Луки, зач. 24

### ПО ПОЛИЕЛЕЕ СЕДАЛЕН:

Юродством Христа ради тело свое духу поработил еси, душу болезнями и страданьями освятил еси, блаженне Андрее. Житие свое, яко жертву совершенну, духом совершаемую, представил еси Господеви. Имже возлюблен быв, яко Того единого возлюбил еси: божественная благодати был еси воистину жилище.

### ПО 50 ПСАЛМЕ стихира, глас 6.

Крест Христов на рамена своя приял еси, сораспялся любовью миру, и, последовавши заповедем Спаса Христа, суемудрие житейское и всякое пристрастие отвергши, дивным житием просиял еси, и восприял еси вечное блаженство. И днесь Господеви предстоя,

помяни всех присно чтущих тя, блаженне  
Андрее.

## КАНОН СВЯТОМУ БЛАЖЕННОМУ АНДРЕЮ, ГЛАС 8

### ПЕСНЬ 1.

**Ирмос:** Воду прошед, яко сушу...

ев: Святой блаженный отче Андрее, моли Бога о  
нас.

Очистимся духом и смирим умы и сердца наши,  
омраченные страстьми, яко да светло и  
радостно восхвалим дивного подвигом  
блаженного Андрея, Симбирскую славу и  
заступление.

ев: Святой блаженный отче Андрее, молим Бога  
о нас.

Луч божественнаго просвещения ныне нам  
возсия: приидите вернии, да озаримся светом  
высоты подвига его, да возгоримся духом,  
песнями блаженнаго Андрея величающе.

Слава Отцу, и Сыну, и Святому Духу.

Подвигом юродства во Христе украшен еси,  
видимо высший смысл показуя, блаженне  
Андрее: несмысленная обличая, приводя верных  
к покаянию.

И ныне, и присно, и во веки веков. Аминь.

Во успении мира не оставила еси, Дево чистая,

и ныне нас не оставяй молитвами Твоими, и умири мир Твой, Богородице.

### ПЕСНЬ 3.

**Ирмос:** Небеснаго круга...

В житии своем душевную чистоту стяжав, без неяже никто не узрит Господа, Андрее блаженне отче наш. Ныне же страсти омраченных душ наших утоли молитвами твоими.

О всех благах на земли не радев, любовьию ко Христу уязвляем, себе отвергшеся и во плоти, яко ангел, явися, страсти умертвил еси, Андрее преблаженне.

Слава: Земная вся отринув, небесная наследовал еси, блаженне Андрее. В житии град твой от запалений огненных соблюдал еси, угаси и пламень страстей наших.

И ныне: Милости и любве источниче, Дево чистая, молим тя: молитвами Твоими мир сохрани и спаси люди отчаянныя.

### ПЕСНЬ 4.

**Ирмос:** Ты моя крепость, Господи...

Гордым умом людие тцашася уразумети высшая, но токмо смиренным Господь дает благодать узрети небесная. Темже молим тя, блаженне, молитвами твоими спаси души наша. Безстрастием украшен еси и смирением Христа

ради блаженства высоты достиг еси, предивне.  
Души наша твоим смирением сохрани.  
Слава: Земная отринув и суетная яко тщетная  
вменив, страсти умертвил еси, блаженне Андрее.  
Темже в вечное Царство вселился еси, терпения  
ради своего.  
И ныне: Цвет чистоты и спасения Двери,  
молитвами Твоими спаси град сей и страну  
нашу, Богородице, чистая и благословенная.

### ПЕСНЬ 5.

**Ирмос:** Вскую мя отринул еси...  
Простое и беспорочное житие от юности твоея  
потщался еси, блаженне, сохранить: высоту  
смирения твоего видев, Пресвятый Дух вселился  
в тя.  
Погребл еси страстей возстание умерщвлением  
гордыни и всецельм самого себе отвержением,  
жизнь бесконечную приял еси от Господа. Днесь  
церковь Симбирская светло празднует память  
твою, блаженне Андрее.  
Слава: Настави нас на путь покаяния, блаженне  
Андрее, всегда уклоняющихся от пути праваго,  
злу ума и гордыне сердца служаще и присно  
милосердие Божие прогневающих.  
И ныне: Источаеши реку исцелений, Дево,  
недугующим: ты бо влага врачующая души  
гордыней болящия, и милости пучино всем Тя,

Богородице, призывающим.

## ПЕСНЬ 6.

**Ирмос:** Очисти мя, Спасе...

Зря чистым сердцем сокровенная и  
нераскаянных во зле строго обличавый,  
непорочным житием блаженство уллучив, не  
престай, блаженне, молитися о чтущих святую  
память твою.

Чист быв сердцем, к чистому источнику  
благодати притекл еси и душу твою освятил еси  
светлейших струй причащением, темже и  
Господь тя прослави.

Слава: Святому лику истинных ученик  
Христовых причислен еси, блаженне Андрее, с  
ними же Владыце предстоя, непрестанно  
поминай нас молитвами твоими.

И ныне: О, Дево Пречистая, наше упование и  
прибежище во грехах погибающих: простри нам  
руку помощи Твоя и спаси нас.

## КОНДАК, глас 4.

Юродства одеждею украшен еси,  
Попечение презрев о плоти тленней,  
Венец нетления стяжал еси небесный.  
Духовною нищетою облеклся еси  
И по слову Спасову  
В Царствие вечное вселился еси

И престолу Божию предстоя,  
Немолчно о нас ко Христу взывающий,  
Блаженне Андрее, предивный чудотворче.

## ИКОС

Душу свою, яко дар смиренный Христу принес  
еси, преукрашенну бисером подвига твоего. Сего  
ради и Господь ты прослави и многими дарами  
почти: на земли быв осиян высотой уничижения  
и юродства лишеньми, темже на небеси венцем  
славы украсился еси, блаженне Андрее. Ныне же  
молися ко Господу даровати душам нашим  
велию милость.

## ПЕСНЯ 7.

**Ирмос:** Божия снисхождения...

Очистив ум благодатию и сохранив его цел от  
суемудрия, чувства души добре управив и к  
высоким устремился еси, нас молитвами твоими  
не оставляя.

Житейское мудрование умертвил еси  
воздержанием и смирением на небеса восход  
сотворил еси, блаженне Андрее, души верных  
благодатию дарований твоих ныне  
просвещаеши.

Слава: Все житие заповедем Христовым  
поработив, блаженства вечнаго достиг еси,

силою Божиею укрепляем. Укрепи и нас немощных молитвами твоими.

И ныне: Заступнице мира, Мати Всепетая, помощь всем погибающим в пучине греховней, простри над нами покров милости Твоея, Богородительнице.

## ПЕСНЬ 8.

**Ирмос:** Седмерицею пещь...

овинулся еси во всем Господеви, блаженне, в хранении жития непорочного силою Его укрепляем, ум, сердце и волю в дар принося величию Божию

Ныне с лики святых и праведных предстоиши престолу Царя царствующих, небесною благодатию осиянный, блаженне Андрее, молитвами твоими страстей и прилогов вражиих избавляй нас.

Слава: Труды в подвиге юродства Христа ради подъяв в жизни своей, блаженно по трудех почил и упокоился еси в Господе, сошел еси во гроб, яко пшеница для житницы Божией созревшая.

И ныне: Ведает весь мир Тя роду христианскому Заступницу и Молитвенницу, окропи нас иссопом милости Твоея, Владычице, и очисти нас, да Твоим матерним заступлением паче

снега убелимся.

## ПЕСНЬ 9.

**Ирмос:** Ужасеся о сем небо...

Зряще божественную светлость и всех святых, радующихся о Господе, блаженне Андрее, с ними моли Человеколюбца Христа, жития исправление и грехов оставление подати хвалящим верно память твою.

От Бога дивным разумом небесным просвещен, просвети умы сердец наших, омраченных гордынею и прегрешений мглою, просвети молитвами твоими.

Слава: Храм Святому Духу себе сотворив, блаженне Андрее, темже и нас, молитвами твоими, селения Ему соделай и от всяких напастей и озлоблений избави.

И ныне: Чистая и славная голубице, Мати и Дево, щедроты Твоя ниспошли нам от неизреченных милостей Твоих и избави нас от всякия нужды и печали.

## СВЕТИЛЕН.

Велиим подвигом жития твоего, блаженне Андрее, смирением и самоотвержением, яко крилома, высоты блаженства достиг еси и непорочного жития ради почести от Бога приял еси: и ныне Господь явил нам цельбоносныя

мощи твоя. Темже молим тя, блаженне, поминай нас, верою чтущих святую память твою.

Пречистая Владычице, милосердаго Спасителя миру рождающая, помилуй нас, озлобленных смутною дний сих и в суемудрии отступивших от спасительных заповедей Христовых и греху поработивших себе гордым своим хотением. Обрати нас, Мати Божия, к свету Сына Твоего молитвами Твоими.

### НА ХВАЛИТЕХ СТИХИРЫ, глас 8.

Неуклонно, преблаженне, прямо путь жизненный шествовал еси, юродствуя Христа ради, вся плотская мудрования умертвил еси и суетная мира, яко паучину, отряс еси, небесную высоту возлюбил еси, идеже со всеми святыми срадуешься, блаженне Андрее, моли спастися душам нашим.

От юности до старости разум чист и незлобив младенчески сохранил еси, душу пресветлу тем сотворил еси, блаженством в горних от Господа почтен еси, град свой житием своим украсил еси: сего ради тя почитаем, Андрее блаженне, Ты же не престай молиться о земном отечестве твоём и о творящих память твою.

Соберитесь вернии, днесь в память блаженнаго Андрея, и сию вси радостно торжествуйте: се бо

благочестия крин и о согражданах теплый  
молитвенник, волжских пределов удобрение,  
града Симбирска чудная похвало и заступление,  
к нему же возопиим: блаженне Андрее, моли  
Христа Бога о чтущих святую память твою.

Новое и дивное Церкви украшение,  
преизрядный и дивный угодниче Христов,  
блаженне отче Андрее, моли милостиваго Бога,  
да прегрешений оставление подаст душам  
нашим.

**И НЫНЕ, Богородичен, глас тойже.**

Богородице, ты еси лоза истинная,  
возрастившая нам плод живота: молимся Ти,  
Владычице, со блаженным Андреем, помиловати  
души наша.

